

越縵堂駢俪文集

一  
函  
四冊

越縵堂駢體文卷二

會稽李慈銘著 常熟曾之撰編次男樸校

書

戲擬六朝人與婦書

春驪載秣歲鼓俄催旅人思家觸物增感長安風雪燕  
市塵沙有淚知鄉無錢買醉故園爆竹老屋鐙花客路  
三千一夕數夢輾轉愁歎不知所云吾以命不偶時才  
非適俗青衫逐隊黃榜看人冀以諧價鴻都竊臭郎署  
雖未得宮花博笑綾錦歸遺而節省月入例錢食粟之  
外當上佐菽水下營荆布更俛年勞得一小郡東山掩  
口粗足相酬何意跬步遂致蹉跌爰以友朋敦勸改計

外僚擬於明春負弩聞嶠時會多艱風波翻覆此中窒礙正難預計亦復筆不能述也家書頻煩言之已悉所願和洽娣姒善事高堂勤懇小心以蘄無過我家雖不能臧獲頤指衣食稱心然無過煩擱滯隨便稱厥職以視入澣廁踰出采薪杞固亦嬾道之常處貧之正也吾年逾三十侵尋早衰乏獮婢之恭心盼胡奴之遙集蓄環卜筮雅志非誣然謂阿杜旣來金釵別餉茂陵有娉白頭永吟無良之嗟抑何相薄汝作賓我家並無過譽雖有阿承之謔未聞武達之書况桃葉之迎杳然天際故德非許允事異高柔而經卷藥鑪同龕清絕未嘗鳳臺別眷鸞鏡笑人固猶愈於干日倡家十年蕩子矣卽

今春西鄰一議雖云假以副筭迎之貳室而洛浦生波  
巫雲散雨終成揮忽徒貽笑嘲可知無著天親同脩淨  
果落花衿上證佛看邊此亦鴛牒之三生閨房之淨劫  
也驛梅不來護草焉樹碧雲脩怨黃塵短絨想越水千  
帆秦樓百尺常勞望遠伫憶斟歡報語平安書不盡意  
與柯山親友書

入春十七日得去冬七月所寄書亂後三年始獲此尺  
素回環細讀無閒晤言兄之一生輕信易惑又本無才  
能而思用世以致蹉跎遂至魅乘其暗蜮射其明破家  
棄親幾負世之大誥甚可痛也少緣綺語頓錮豔情閨  
房之好稍異於大馮媵侍之選懸擬乎小杜春黯黯其

花寂秋迢迢而月孤歲時不留倏過年少桑榆之蔭漸  
斜蘭芷之香無歇足下招我歸欲兄急了此願意甚厚  
也而兄白首郎署出則裘敝歸則壁立問亂後之桃源  
尋却餘之柳絮豈易言乎今年上春本擬南返牽於世  
事遂違曩心自屆春分以及上巳每念吾越常禧迎恩  
之郊東郭南門之外景物豐麗殆絕人寰山浮翠鮮水  
拭綠淨港町林抱邨墅花接畛鳥引響浴鷺成羣畫船  
碧篷出明槌以宛宛酒樓青幟招游屐而儻儻路沿紙  
鳶之風渠放秧馬之水柳岸吹碧時露半帆菜畦疊黃  
晴敲萬笠簫鼓達乎月出城郭迴其煙浮蓋離家以來  
思之輒病及病之際又思之輒瘳雖滄桑頓殊而夢寐

不改都中二月草無一青所不異者暖風遲日耳此已  
定計俟八月下旬束裝泛海直下申江重陽前後必可  
抵里當與足下浮小艇束短筇載柯谿之紫菱訪蘿菴  
之黃葉射雉七巖釣魚五橋沽曇釀新酒

邨名

采湖洋老

萸問菊州山卧楓丁港清旭而出落日而歸鐙火出籬

雞豚在柵奉兩家之高堂聚中外之弟妹別後面目各

言瘦肥劫餘蒼黃互相慰幸數戚屬之多故則涕淚閒

作喜骨肉之重敘則僕婢皆懽鄰里賀歸或度牆以供

饌兒童解事亦扶床而不瞑話京洛之見聞朝事歷歷

譚陵谷之變怪鬼燐幽幽茗苑一甌芋栗數器直至打

稻聲歇然松燄殘月苦霜濃各散就寢縱閒居之福勢

難久長而省侍之娛時爲極樂已知足下遲我甚殷故  
先書此以報惟努力強飯蓄暇相待不宣

與沈曉湖書

都門判袂倏將改年思系之深無時忘弭比維歎詠自  
娛興居多福金門謁選何日注銓衮衮長安勞勞寸秩  
想馨逸之業渺焉寡儔定省之懷何能暫釋僕閨夏抵  
里洪浸方稽雞犬鳴于樹顛城堞交乎苔葉漂棺若柿  
測田以篙截截石橋伏度于艇下穹穹孤塔時出乎波  
中際旅人之空歸邁澤國之異變兵火甫定荒荒無餘  
之墟井邑改移黯黯工官之渡余家舊居官瀆旁官瀆  
者越絕書謂句踐工官  
所居橫水舊宅喬桑莫存門前水汝陽故祠宗祏都燼  
地也

予系出唐汝陽王璿故老母經亂瘦甚往時阿宜漸長  
家廟祀王以下在直河老母經亂瘦甚往時阿宜漸長  
癡不解事柯山之西鑑湖之北賃廡三架月出千錢夏  
畦馬醫其井竈牛宮雞柵畝處寢庭出無可攜之僮  
入有交諍之婦郭門宗黨先爲十日之留新河賈人繼  
借一弓之地望門求止具車卽行休源寄居誰爲少府  
思光陸處寧必清漳雖復築非伯夷辟同仲子而急難  
擇菩略等浮家時以小舟載書數帙往來湖上定省高  
堂而已顧猶閒情未釋遙夢是徵姓叶張星貧原越女  
本非婉嬋祇宜練裳之容粗習箏琵琶稍異中閨之質子  
野已老始得蠻鬟耘老長貧所期暮鵲禹穴之探非待  
挈乎清娛南山之詩詎資解于管靖穠年炊玉破屋牽

蘿削竹爲釵裝蘆作禪葦簾紙帳草剝洞房壺粥茶煙  
畧辨黔突以故山水之寄琴書之娛盡奪塵勦幾如隔  
世尤可異者越俗一變悉爲狃獠巖壑所區竟成羅刹  
僕夙持清議見惡鄉人孤鶴未歸羣鴟已噪謬以太守  
故知中丞虛左推薦戚屬助役于江塘承乏師儒暫攝  
夫講席思以清操率衆作古學教後生庶幾君子之國  
竹箭蔚然富中之塘瓠子永塞竟乃吮沙聚射响沫漂  
山噬類瘼瘳訛成市虎被髮爲俗覩章逢而疾驅逐臭  
所都沐薌澤而狂走遂至動搖郡將脅制憲司必使董  
生之帷不安于山上許劭之論永絕于國中蠅蠹子衿  
有逐公超之市魍魎晝錦豈容元禮之門僕素業自航

外事奚恤然平生所恨止坐奇貧未營茆茨之居常涉  
城市之迹儻得一壺自隱五兩能供旣當韜匿煙霞蟬  
蛻塵滓兄家在林麓地擅園池前月仲冬拏舟一往山  
圍得路水曲知邨老樹當門小橋夾涇深歎里第勝絕  
人寰況壽母康彊中閨豔淑鬱然門戶樂備人倫花竹  
猶存琴書無恙而羈栖人海眷戀微官以僕計之深爲  
不取客游早倦歲事正濃綺戶梅花常占喜子高堂樺  
燭日待歸人五斗何需辜此臘酒單車徑發猶及春鐙  
長郎學賈杭州愛女新歸陸氏一切平安弗以爲念貧  
冗尠閒久未通問莫雲落月想同此心因便縷陳惟期  
愛護

復沈曉湖書

曉湖老兄先生講席去今兩年比得手書闕然久不報  
非嬾也舊疾新恙日月以甚人事應酬讀書作輟加以  
栽花種樹飼犬數雞麥雜米鹽澆灌瓜果身錮一室而  
目營四時食僅數勺而勞倍兼力家庭瑣碎喜怒不恆  
瀛海詭譎駭愕百變嗒焉而息如陳尸之在牀一卷在  
手疑槁木之入定以致廿年曹局長官虛左而不前萬  
里故人饋問歷稊而不答欲與兄言生平之舊歡述旬  
朞之近得述情話寫靈衿輒異時而不紆申紙而不下  
也今春二月山妻入都遠承豐貺滿飫清風嗣由王子  
獻遞來昔歲一書知賢從兄及雲塋楊君拜辱惠遺知

子之來不惟其物貧交過念慙感靡涯弟輦轂索居謗  
讐日積賤儒僞行畏發覆而割襟怪士侘詩見正景而  
卻步其一二嗜名噉異者始則恃爲聲氣恐翕熱之後  
人繼則幸竊虛車遂反弓而先發然而寒松千尺不以  
涼燠改陰明鏡一泓豈憚襍祥互照故南北殊性者不  
可以氣孚通塞各途者不可以道洽自古而然匪今日  
矣所可慨者舊姻瓜葛老無一存總角釣游經亂俱盡  
卽至中年文社之契旅邸鄉里之集長安觴豆盡是南  
鮭文牘往來半爲越語而兄司鐸窮山遠隣閩邑景蓀  
少伯久絕音書牧莊寶卿已爲異物冒夫詹事遽化蜀  
中伯寅尙書今春奉諱夫舊雨之死喪日至而新知之

山川益深非鳥獸之是羣何金石之不蝕乎子獻連丁  
大故積毀一身勉學嗇名好修致忌甬上僑眷聞已挈  
還負土栽松積瘁可想吾郡修志一事諸子頗相牽輓  
枌榆文獻雅志所勤及今不圖後將難問而挂冠無日  
負郭誰資且勢競道孤事大力小亦不敢孤鳴衆狷之  
地磨肋老拳之間儻得三徑可成四壁矗立誓墓旣畢  
此願難誣不求問人惟求信己事出私力無假官修當  
邀兄與景蓀及子縝子宜子獻諸君各殫見聞務臻翔  
實以籃輦爲長物徧歷名山賃畫舫而寄家窮搜澤藪  
寺藥觀牒逢僧卽求系譜楔旌望門相叩摩碑碣於破  
芻詢傳聞於老甿一水源流荀谿谿父荒山蹤跡亦問

樵人藉以獨浪煙霞飽飧泉石不亦補巢由於桑映償  
禽向於家山乎修志私議別紙具聞奉懷一詩亦別寫  
上

荅沈曉湖書

歲莫得十月下旬所寄書詞意簡至傷離歎老誦之黯  
然何其悲也吾儕貧賤不足計所恨者讀書未徧所欲  
言者甚多而歲月已至衰病相踵精神日劣又性命相  
契之友常不得在一處宴宴言笑邈若山河以積瘁之  
身處百憂之地此旁觀之所寒心而況身當之者乎古  
人所以千里趣相思之駕隔年赴雞黍之約者誠懼夫  
事故之不可測而相見之無幾也然世有以芻豢爲養

有以藥石爲養有以服氣導引爲養而吾儕則以道爲  
養所謂道者讀書安貧賤而已挈經以固其神考史以  
充其氣吟詠以暢其性山水以悅其情故古來儒生詩  
人枯槁隱逸往往多壽弟行年五十矣憂傷之事無弗  
嘗疾疢之苦無弗備比以冗員需次久滯京邑一日之  
食營以兼旬隔宿之糧寄之霄漢蓋其窮尤有甚於兄  
者頻年入春稍覺和煦濕疾卽動及將屆夏遂如痿痺  
偃卧床蓐竟日寐寢展卷不能畢一葉伸紙作字不能  
數行每嘆風飈日暄萬物欣動雖檐際庭隙寸土之植  
一莖之卉皆蓍榮滋翠有得時之樂而頑然七尺獨與  
槁木死灰奄奄造物之外往時至秋高候涼宿痼漸起

嚴霜漸降頓若更生一年功力補以數月自去年後入  
秋輒有大病病必兼旬始愈愈不數日復病侵尋以至  
冬盡矣蓋生質更脆榮衛更虛霜霧之感更以易入又  
苦咳嗽夜中尤甚十九不寐淡沫涕洟透茵繞榻沈休  
文所謂後差不及前差後劇必甚前劇者殆又過之今  
年秋冬之際令弟在都所親見也然一室之內書籍丹  
黃未嘗去手隨所賃之地闢地種樹循牆菽花每自荷  
甬抱甕躬泥水之役當興之所至雖烈日炙背嚴飈刺  
肌疏壤剔葉芟枝拾藥不以爲苦或新竹沿階韶花當  
戶綠陰碧淨清風徐來輒洒然自樂不復知身之病也  
性喜泉石結念煙霞雖匿跡朝市之間此身常若在空中

山中故鄉巖壑無夕不入夢西郭村居霞川左右魂神  
所習無時或離次則謝墅漓渚西鳧項里皆先壟所在  
湖橋湖塘夙契所結柯山僑寄之地一旬之中亦必數  
夢之卽兄所居壽勝之山溪林幽蒨廬里靜深以及平  
時所游禹陵之蔥鬱蘭亭之清遠曹山之崢泓雲門之  
緜麗客中魂魄未嘗不時往來其閒也故由前之所陳  
兄當以爲憂由後之所言兄當有以知其樂樂則神全  
神全則外感不能遽傷而羸膺亦足以自立夫人生少  
得八九十者桑榆景光儵忽電滅亦何足把翫况莊生  
有云佚我以老息我以死又曰君子息焉小人休焉弟  
雖少壯失學不克樹立荒嬉懦緩百不如人幸清夜自